

摘藻堂四庫全書薈要

集部

欽定四庫全書薈要

集部

宋詩鈔卷六十一



詳校官候選知縣臣吳甸華

欽定四庫全書薈要卷二萬三百十四

集部

宋詩鈔卷六十一

內閣中書舍人吳之振編

范成大石湖詩鈔上

成大字致能吳郡人也紹興擢進士第授戶曹監和

劑局遷正字累遷著作佐郎除吏部郎官奉祠起知
處州入為禮部員外郎兼崇政殿大學士使金國歸
除中書舍人出知廣西靜江府除敷文閣待制四川

制置使召對除權吏部尚書拜叅知政事奉祠起知
明州除端明殿學士尋帥金陵進資政殿學士再領
洞霄宮加大學士卒所居石湖在太湖之濱阜陵宸
翰扁之其詩縟而不釀縮而不窘新清嫵媚奄有鮑
謝奔逸俊偉窮追太白當是時石湖與楊誠齋陸放
翁尤遂初皆南渡之大家也誠齋言余於詩豈敢以
千里畏人者而於公獨斂衽焉

河豚嘆

鰕生藜苳腸食事一飽足腥腐色所難況乃衷醜毒膨
亨強名魚殺氣孕慘黷既非養生具宜謝砧几酷吳儂
真差事網索不遺育捐生決下箸縮手汗童僕朝來里
中子饒吻不待熟濃睡喚不應已落新鬼錄百年三寸
咽水陸富有藪一物不登俎未負將軍腹為口忘計身
饕死何足哭作俑者誰歟至今走末俗或云先王意除
惡如執菽逆臬與毒獍歲歲參幣玉芟夷入薦羞蓋欲
殲種族死生有定數斷命烏可續適丁是時者未易一

理局龜鼎子公怒羊羹華元衄異味古所珍無事苦畏
縮駢頭訐此語戒諭祇取瀆聾盲死不悟明知諒已燭
續長恨歌七首

金盤潑灩曉粧寒國色天香勝牡丹白鳳詔書來已暮
六宮鉛粉半春闌

紫微金屋閉春陽石竹山花却自芳莫道故情無覓處
領巾猶有隔生香

聞道蓬壺重見時瘦來全不耐風吹無端卻作塵間念

已被仙宮聖得知

別後相思夢亦難
東虛雲路海漫漫
仙凡頓隔銀屏影
不似當時取次看

人似飛花去不歸
蘭昌宮殿幾斜暉
百年只有雲容姊
留得當時舊舞衣

驪山六十二高樓
突兀華清最上頭
玉羽川長湘浦暗
三郎無事更神遊

帝鄉雲馭若為留
八景三清好在否
玉笛不隨雙鶴去

人間猶得聽梁州

過平望

寸碧闔高浪孤墟明夕陽水柳搖病綠霜蒲蘸新黃孤
嶼乍舉網蒼煙忽鳴榔波明荇葉顫風熟蘋花香鷄犬
各村落蓴鱸近江鄉野寺對客起樓陰濯滄浪古來離
別地清詩斷人腸亭前舊時水還照兩鴛鴦

長安閨

斗門貯淨練懸板涼驚雷黃沙古岸轉白屋飛簷開是

間表丈許舳艫蔽川來千車擁孤隧萬馬盤一坏篙尾
亂若雨檣竿束如堆摧摧勢排軋洶洶聲喧飀偪仄復
偪仄誰肯少徘徊傳呼津吏至敝蓋凌高埃囁嚅議譏
征叫怒不可裁吾觀舟中子一一皆可哀大為聲利驅
小者饑寒催古今共來往所得隨飛灰我乃羈旅人胡
為乎來哉

兩木

壬申五月病卧北窓惟庭柯相對手植綠橘枇杷皆

森然出屋枇杷已著子橘獨十年不花各賦一首

枇杷昔所嗜不問甘與酸黃泥裹餘核散擲籬落間春
風坼勾萌樸橄如榛管一株獨成長蒼然齊屋端去年
小試花瓏瓏犯冰寒化成黃金彈同登桃李盤大鈞播
羣物斡旋不作難樹老人何堪攬鏡覓朱顏頷髭爾許
長大笑歌巾冠

綠橘生西山得自髯翁家云此接活根是歲當著花俛
仰乃十霜垂蠹紛相遮芳意竟寂寞枯枝謾槎牙風土

諒非宜翁言豈余夸會令返故山高深謝汚邪石液滋
舊根山英摧新葩黃團挂霜實大如崆峒瓜當有四老
人來駐七香車

落鴻

落鴻聲裏怨關山淚濕秋衣不肯乾只道一番新雨過
誰知雙袖倚樓寒

浙江小礮春日

客裏無人共一杯故園桃李為誰開春潮不管天涯恨

更捲西興暮雨來

二月三日登樓有懷金陵宣城諸友

百尺西樓十二欄日遲花影對人間春風已入片時夢
寒食從今數日間折柳故情都望斷落梅新曲與誰關
詩成欲訪江南便千里煙波萬疊山

代聖集贈別

一曲悲歌水倒流尊前何計緩千憂事如夢斷尋無處
人似春歸挽不留草色粘天鷓鴣恨雨聲連曉鷓鴣愁

迢迢綠浦帆飛遠
今夜新晴獨倚樓

寒食郊行書事二首

野店垂楊步荒祠苦竹叢
鷺窺蘆泊水鳥啄紙錢風
媼引濃粧女兒扶爛醉翁
深村時節好應為去年豐
隴麥欣欣綠山桃寂寂紅
帆邊漁蕝浪木末酒旗風
信步隨芳草迷途問小童
賞心添脚力呼渡過溪東

初夏二首

清晨出郭更登臺
不見餘春只麼回
桑葉露枝蠶向老

菜花成莢蝶飛來

晴絲千尺挽韶光
百舌無聲燕子忙
永日屋頭槐影暗
微風扇裏麥花香

曉行

篝燈驛吏喚人行
寥落星河向五更
馬上誰驚千里夢
石頭岡下小車聲

秦淮

不將行李試開關
誰信江湖道路難
腸斷秦淮三百曲

船頭終日見方山

白鷺亭

倦遊客舍不勝閒
日日清江見倚欄
少待西風吹雨過
更從二水看淮山

脂井三首

昭光殿下起樓臺
拌得山河付酒盃
春色已從金井去
月華空上石頭來

午睡醒來一夢非
匆匆玉樹逐春歸
臙脂却作千年計

不似愁魂四散飛

腰支旅拒更神遊
桃葉山前水自流
三十六書都莫恨
煩將歌舞過揚州

九月三日宿胥口始聞雁

故人久不見乍見雜悲喜
新雁如故人一聲驚我起
把酒不能觴送目問行李
曾云行路難空濛千萬里
塞北多關山江南渺雲水
風高吹汝瘦旅伴今餘幾
斜行不少駐滅沒蒼煙裏
羈遊吾亦倦客程殊未已
扁舟費年

華短纜繫沙尾物性各有役冥心聽行止江郊匝地熟
場圃平如砥歸期且勿念其飽豐年米

姑惡

姑惡水禽以其聲得名世傳姑虐其婦婦死所化東
坡詩云姑惡姑惡姑不惡妾命薄此句可以泣鬼余
行茗雪始聞其聲晝夜哀厲不絕客有惡之以為此
必子婦之不孝者余為作後姑惡詩

姑惡婦所云恐是婦偏辭姑言婦惡定有之婦言姑惡

未可知姑不惡婦不死與人作婦亦大難已死人言尚如此

大暑舟行含山道中雨驟至霆奔龍挂可駭

隕雲暖前驅連鼓訶後殿駸駸失高丘擾擾暗古縣白
龍起幽蟄黑霧佐神變盆傾耳雙瞶斗暗目四眩帆重
腹逾飽櫓潤鳴更健圓漪暈雨點濺滴走波面伶俚愁
孤鴛颭閃亂饑燕麥老枕水卧秧稈與風戰牛蹊爰城
沈蟻隧洶飢建水車競施行歲事敢休宴咿啞哺簞鳴

輓轡連鎖轉駢頭立婦子列舍望宗伴東枯駭西潰寸
涸驚尺澱嗟余豈能賢與彼亦何辨扁舟風露熟半世
江湖徧不知憂稼穡但解加餐飯遙憐老農苦敢厭遊
子倦

題畫卷二首

鑿落秋江水石明高楓老柳兩灘橫君看疊巘雲容變
又有中宵雨意生

歌傾棧路繞山明隔隴人家犬吠聲無限白雲堆去路

不知誰識許宣平

立春日郊行

竹擁溪橋麥蓋坡
土牛行處亦笙歌
麴塵欲暗垂垂柳
醅面初明淺淺波
日滿縣前春市合
潮平浦口暮帆多
春來不欲無兼句
奈此金旛綵勝何

晚潮

東風吹雨晚潮生
疊鼓催船鏡裏行
底事今年春漲小
去年曾與畫橋平

一篙

一篙新綠浦東西
雪絮漫江雁不飛
宿雨纔晴風又轉
片帆那得及時歸

碧瓦

碧瓦樓前繡幙遮
赤欄橋外綠溪斜
無風楊柳漫天絮
不雨棠梨滿地花

暮春上塘道中

客舍無煙野水寒
競船人醉鼓闌珊
石門柳絮清明市

洞口桃花上巳山飛絮著人春共老片雲將夢晚俱還
明朝遮入長安道慙愧江湖釣手閒

餘杭道中

落花流水淺深紅盡日帆飛繡浪中
桑眼迷離應欠雨麥鬚騷殺已禁風
牛羊路杳千山合鷄犬村深一徑通
五柳能消多許地客程何苦鎮匆匆

陳侍御園上坐

愁眼逢歡春水明詩情得酒春雲生
花梢蝴蝶作團去

竹裏鶉鳩相對鳴邂逅浮生此日好纏綿俗累何時輕
擘牋沫墨乏奇句撼笛當筵慙妙聲

獨遊虎跑泉小菴

苔徑鬱環入茅齋取次成蔓花緣壁起間草上階生宿
雨松篁色新晴燕雀聲筒泉烹御米聊共老僧傾

樂神曲

豚蹄滿盤酒滿杯清風瑟瑟神欲來願神好來復好去
男兒拜迎女兒舞老翁翻香笑且言今年田家勝去年

去年解衣折租價今年有衣著祭社

綠絲行

小麥青青大麥黃原頭日出天色涼
姑婦相呼有忙事舍後煮繭門前香
綠車嘈嘈似風雨繭厚絲長無斷縷
今年那暇織絹著明日西門賣絲去

田家留客行

行人莫笑田家小門戶雖低堪洒掃
大兒繫驢桑樹邊小兒拂席軟勝氈
木白新春雪花白急炊香飯來看客

好人入門百事宜今年不憂蠶麥遲

催租行

輸租得鈔官更催踉蹌里正敲門來手持文書雜嗔喜
我亦來營醉歸爾床頭慳囊大如拳撲破正有三百錢
不堪與君成一醉聊復償君草鞋費

癸亥日泊舟吳會亭

去年春盤浙江驛湛湛清波動浮石今年春盤吳會亭
冥冥細雨濕高城天邊作客風沙裏去年今年成老矣

客心古井冷無波過眼人情亦如水憶昔三生住翠微
偶來平地著征衣山中故人應大笑扁舟坐穩何當歸
題開元天寶遺事四首

御前羯鼓透春空笑覺花奴手未工一曲打開紅杏蕊
須知天子是天公

謝蠻舞袖貴妃絃秦國如花號國妍不賞纏頭三百萬
阿姨何處費金錢

朝天車馬詔頻催斷得新湯未敢開忽報豬龍掀宇宙

阿瞞空讀相書來

剥啄延秋屋上烏
明朝箭道入東都
宮中亦有風流陣
不及漁陽突騎粗

半塘

柳暗閭門逗曉開
半塘塘下越溪回
炊煙擁柁船船過
芳草緣堤步步來

楓橋

朱門白壁枕灣流
積李無言滿屋頭
牆上浮圖路傍堦

送人南北管離愁

橫塘

南浦春來綠一川
石橋朱塔兩依然
年年送客橫塘路
細雨垂楊繫畫船

天平寺

舊遊彷彿記三年
轟飲題詩月滿山
山上白雲應解笑

又將塵土浣朱顏

三年前至先兄與余同唐少梁登山絕頂比歸迷路捫蘿而下夜已午後

山僧散遣羣僮秉燭求余三人久而莫得以為已仙也是夜宿寺中聯句達曉東坡曰自從有此人白石封蒼

若何嘗有此樂將去復
徘徊至今往來于余心

賀樂丈先生南郊新居

新堂燕雀喜竹籬挂藤蘿崩奔風濤裏得此巢龜荷西
山效爽氣南浦供清波會心不在遠容膝何須多先生
淮海俊踏地嘗兵戈飄飄萬里道芒鞋厭關河風吹落
下邑楚語成吳歌豈不有故國荒垣鞠秋莎無庸說當
歸到處皆南柯卜遷不我遐一水明青羅閉戶長獨佳
奈客剝啄何會令蒼苔石屐齒如蜂窠

田舍

呼喚攜鉏至安排築圃忙兒童眠落葉烏雀噪斜陽煙
火村聲遠林菁野氣香樂哉今歲事天末稻雲黃

病中夜坐

村巷秋舂遠禪房夕磬深饑蚊嘗遶髻暗鼠忽鳴琴薄
薄寒相中稜稜瘦不禁時成洛下詠卻似越人吟

十一月十二日枕上曉作

竹響風成陣窓明雪已花柴扉冷凍犬紙瓦啄饑鴉宿

酒欺寒力新詩管歲華日高猶擁被尊食媿鄰家

除夜書懷

運斗寅杓轉周天日御回夜從冬後短春逐雨中來鬢
綠看看雪心丹念念灰有懷憐斷雁無思惜疎梅絮厚
眼生纈蔬寒腸轉雷燭花紅瑣碎香霧碧徘徊昨夢書
三篋平生酒一盃床頭新歷日衣上舊塵埃搖落何堪
柳紛紜各夢槐隙光能幾許世事劇悠哉岐路東西變
羲娥日夜催頭顱原自覺懷抱故應開踴躍金何喜青

黃木自灾身謀同斤鷄政爾願蒿萊

題張氏新亭

水楊成幄翠相遮猶有東風管物華
葉底青梅無數子梢頭紅杏不多花
煩將練火炊香飯更引長泉煮鬪茶
約我詩成須疥壁莫嗔歌側似歸鴉

病中絕句八首

空裏情知不著花逢場將病作生涯
蒲團軟暖無時節夜聽蚊雷曉聽鴉

溽暑熏天地湧泉
彎跼避濕挂行纏
出門斟酌無忙事
睡過黃梅細雨天

石鼎颼颼夜煮湯
亂拋參朮闢溫涼
化兒幻我知何用
祇與人間試藥方

病中心境兩俱降
猶憶江湖白鳥雙
一夜雨聲鳴紙瓦
聽成飛雪打船窓

簷頭排溜密如簾
溪上層陰寒解巖
最是看山奇絕處
白雲堆絮擁青尖

夜合梢頭蘸紫茸
菜葱頂上折黃封
去年團扇題詩處
依舊疎簾細雨中

盆傾瓴建夜翻渠
繞屋蛙聲一倍粗
想見西堂渾不睡
明朝踏濕看菖蒲

晴色先從喜鵲知
斜陽一抹照天西
竹鷄何物能無賴
如許泥深更苦啼

雲間湖光亭

微風不動歛濤湍
組練晶晶色界寒
斜照發揮猶未盡

月明殘夜更來看

雪霽獨登南樓

雪晴風勁晚來冰樓上奇寒病骨驚雀啄空簷銀筍墮
鴉翻高樹玉塵傾青帘閃閃千家靜黃帽亭亭一水橫
坐久天容卻溫麗一彎新月對長庚

上沙遇雨快涼

刮地風來健葛衣一涼便覺暑光低雲頭龍挂如垂筋
雨在中峯白塔西

自天平嶺過高景菴

卓筆峰前樹作團
天平頂上石成闌
綠陰匝地無人過
落日秋蟬滿四山

曉自銀林至東潮登舟寄宣城親戚

曉山障望眼
脉脉紫翠橫
澄江已不見
況乃江上城
結束治野裝
木末浮三星
羸馬隴頭嘶
小車谷中鳴
亭亭東潮樹
練練綠浦明
篙師笑迎我
新漲沒蘋汀
徑投一葉去
雲水相與平
聊將塵土面
照此玻璃清
懷我二三

友高堂晨欲興風細桐葉墮露濃荷蓋傾凝香繞燕几
安知路傍情

復自姑蘇過宛陵至鄧步出陸

漿家饋食槿為藩酒市停驂竹廡門紅樹亭亭棲晚照
黃茅杳杳被高原飲溪有迹於菟過掠草如飛撲渥翻
車軌如溝平地少飽帆天鏡憶江村

南塘冬夜唱和

燃箕烘暖夜窓幽時有新詩趨唱酬為問灞橋風雪裏

何如田舍火爐頭寒釭欲暗吟方苦凍筆難驅字更道
絕笑兒癡生計淡畧無歲晚稻梁謀

花山村舍

潦退灘灘露沙虛岸岸頽澗聲穿竹去雲影過山來柳
菌粘枝住桑花共葉開庵廬少來徃門巷濕蒼苔

清明日狸渡道中

灑灑沾巾雨披披側帽風花然山色裏柳卧水聲中石
馬立當道紙鳶鳴半空播間人散後烏鳥正西東

南塘寒食書事

埂外新陂綠岡頭宿燒紅裹魚蒸菜把饋鴨鎖筠籠酒
侶晨相命歌場夜不空土風并節物不與故鄉同

高淳道中

路入高淳麥更深草泥沾潤馬駸駸雨歸隴首雲凝黛
日漏山腰石滲金老柳不春花自蔓古祠無壁樹空陰
一簞定屬前村店衮衮炊煙起竹林

宿牧馬山勝果寺

佛燈已暗還吐旅枕纔安卻驚月色看成曉色溪聲聽作松聲

自寧國溪行至宣城舟人云凡百八十灘

波驚石險夜喧雷晚泊旗亭笑眼開休問行人緣底瘦
適從百八十灘來

晚步西園

料峭清寒結晚陰飛來院落怨春深吹開紅紫還吹落
一種東風兩樣心

早發竹下

結束晨粧破小寒，跨鞍聊得散疲頑。
行衝薄薄輕輕霧，看放重重疊疊山。
碧穗炊煙當樹直，綠紋溪水趁橋灣。
清禽百轉似吟客，正在有情無思間。

後催租行

老父田荒秋雨裏，舊時高岸今江水。
傭耕猶自抱長饑，的知無力輸租米。
自從鄉官新上來，黃紙放盡白紙催。
賣衣得錢都納卻，病骨雖寒聊免縛。
去年衣盡到家口，

大女臨歧兩分首今年次女已行媒亦復驅將換升斗
室中更有第三女明年不怕催租苦

次韻子文衝雨迂使者道聞子規

夢魂翩蝶翅鼻息吼鼉鼓喚起治曉粧馬嘶僮僕語汨
泥溷見驚慙愧黃鵠舉猥吟媿隅池浪廢桔槔圃啼鵲
撩客心鉤引着何許請歌蘇仙詞歸耕一犁雨

次溫伯用林公正劉慶充唱和韻

前山後山梅子雨屯雲日夜相吞吐長林絕壑望不到

時有樵歸說逢虎奔溪朝來忽怒漲夾岸柳梢餘尺許
屋頭未放濃嵐散苦憶清光泛瓊宇客行落此亂山中
但欲尋人訴羈旅比鄰邂逅得清士眉宇津津佳笑語
杯行起舞出新句我氣已衰聊復鼓明年與君航太湖
扁舟踏浪不踏土沈沈玉柱閤仙局矯矯虹梁浮水府
目力無窮天不盡却笑向來誰縛汝

次韵温伯謀歸

官路驅馳易折肱官曹隨處是愁城隨風片葉鄉心動

過雨千峯病眼明一臈何須嘗世味寸田久已廢吾耕
羨君早作歸歟計屈指從今幾合并

慶充自黃山歸索其道中詩書一絕問之

鳴騶如電馬如雷知是婆婆醉尉回常日錦囊猶有句
況從三十六峯來

賞雪騎鯨軒子文夜歸酒渴侍兒薦茗飲蜜漿明
日以詫同遊戲為書事邀宗偉同作

溪山四時佳今夕更奇絕天公妙莊嚴施此一川雪飛

花浩如海眩轉寒空濶水西萬株樹玉塔照銀闕碧漢
不受凍長灘瀉清咽漁舟晚猶泛樵擔寒未歇懸知畫
不到未省詩能說歸來強搜句冰硯冷于鐵不如嚴夫
子迎門生暖熱梅香不可耐但覺酒腸渴蜜融花氣動
茶泛乳膏發寧辭春筍寒為暖花甌滑薑騰畫屏暖喚
起眼餘顚喚我獨何事作此淡生活想像高唐賦何如
徑排闥

雪後守之家梅未開呈宗偉

瓦溝凍殘雪簷溜黏輕冰破寒一竿日春隨人意生端
葉再三白南枝尚含情定知司花女未肯嫁娉婷官居
若無賴一笑如河清落木露荒山寒溪遶孤城朝暮何
所見雲黃叫饑鷹東風不早計愁眼何當明北鄰小橫
斜蘚地可班荆憑君趣花信把酒撼瓊英

次韻宗偉閱番樂

十日間愁晝掩闌起尋一笑共清歡罷休詩社工夫淡
洗淨書生氣味酸盡遣餘錢付桑落莫隨短夢到槐安

綉靴畫鼓留花住
刺舞春風小契丹

五月聞鶯二首

桑陰淨盡麥頭齊
江上聞鶯每歲遲
不及曉風鴨鵝子
迎春啼到送春時

一聲初上最高枝
忙殺嘔啞百舌兒
老盡西園千樹綠
却憐槐眼正迷離

送子文雜言

陰谷雲低梅雨多
黃山滌源溪湧波
南風匝地送歸客

雙槳下瀨如投梭嚴夫子君舉酒我其為君歌萬山叢
叢石鑿鑿官居破屋巢煙蘿杜鵑曉啼猿莫叫客行到
此真蹉跎窮愁無復理一飲三嘆息城東蠻舍有佳人
邂逅使我加餐食同鄉更同調目擊心已傳螫蟲欲作
雷奮地萬籟方寂風行山吹竽喚我醒連鼓相追攀飈
車電轂不可輦但覺兩腋生飛翰狂歌不必終曲戲奕
不必滿局有時不揖上馬去出門大笑驚僮僕窮鄉眼
冷見未曾道上躡嚙相指目云此陘隘何以有二士直

恐翩翩跨黃鵠廣文組解登王畿諸公貴人爭勸歸常
日心期有定論贈行不惜重費詞腰金佩玉衆目好折
簡沈碑千載癡一尊有意重山嶽五鼎無心輕網絲嚴
夫子應領畧別後頻書相發藥我既為萬頃之狎鷗君
勿作九臯之鳴鶴

新館

露稻黏明璫風芽衮高浪荒荒白楊道行行亂蟲響日
脚午未吐雲頭晚猶漲欣此半日涼藍輿走清曠病客

不堪暑茲行天肯相蚊蟲掃無迹秋意滿千嶂相尋泉
石盟略褫簿書障鵠原定相念因風報無恙

臨溪寺

萬山遶嶢峴二水奔瀕洞亭亭林中寺金碧燦欄棟解
鞍得蒲團卧受瓦爐供少捐一炊頃暫作百年夢無人
自驚覺幽禽正清哢倦客如殘僧無力供世用此行端
為山紫翠迭迎送漱井出門去驚塵撲飛鞚

盤龍驛

聞鷄一唱罷占星三斗沒天高月徘徊野曠山突兀暗
蛩泣草露怨亂語還咽涼螢不復舉點綴稻花末惟餘
絡緯豪悲壯殷林樾小蟲亦何情孤客心斷絕魂驚板
橋穿足側石子滑行路如許難誰能不華髮高城謾回
首疊嶂屹天闕遙知秋衾夢千里一飄忽

竹下

松杉晨風清桑柘暑陰薄稻穗黃欲卧槿花紅未落秋
鶯尚嬌姹晚蝶成飄泊犬駢逐車馬鷄驚撲籬落道逢

行商問平生幾芒屨
頰肩走四方為口不計腳劣能濡
簞瓢何敢議囊橐我亦糜斗升
三年去丘壑二俱亡羊耳未用苦
商畧

寒亭

溝塍與澗合隴畝抱山轉
向來六月旱此地免焦卷
早穗已垂垂晚苗猶剪剪
一川豐年意比屋聞鷄犬
老農霜鬚髻矍鑠黃犢健
自云足蹈地常賦何能免刈熟倩
人輸不識長官面
康年無復事但恐社酒淺我亦有二

頃收拾尚可繭懷哉笠澤路歸鋤犁頭蘚

清逸江

微生本漁樵長日渺江海扣舷濯滄浪尚說天宇隘
竭來車馬路悒悒佳思敗黃塵撲眉鬚驅逐似償債
羸駮繫偏仄狂犬吠荒恠鄉心入旅夢一葉舞澎湃
晨興過墟市喜有魚蝦賣眼明見清江積雨助橫潰
褰裳喚扁舟艤颺不勝載不辭野渡險弄水聊一快

新嶺

瘦馬兀背騰荒鷄號蒼莽絲窠冒朝露籬落萬蛛網宿
雲拂樹過飛泉擘山響老桑踡潜蚪怪蔓挂騰蟒山行
何許深空翠滴羈鞅釀愁積雨寒破悶朝日放瞳瞳赤
幟張昱昱金鉦上浮動草花馥清和野禽唱僕夫有好
語沙平路如掌惟憂三溪阻橋斷山水漲

送通守趙積中朝議請祠歸天台

城頭千峯青繞屋城下灘流三百曲誰云偈仄復偈仄
尚有高軒肯來辱紅梅花下雨芳春春風惠和如主人

搶攘塵土簿書裏見此練籍天球溫厚祿故人車結轍
掉頭獨泛清溪月不從世外得超然世間誰肯如公決
生平我亦一沙鷗葦白蘆黃今正秋送公使我歸思動
破煙衝雨憶扁舟明年想見東山起我亦煎茶石橋水
道逢蓑笠把漁竿即是馬曹狂掾史

送詹道子教授奉祠養親

新安學宮天下稀先生孝友真吾師斑衣誤作長裾曳
二年思歸今得歸牋詞上訴人叵挽璽書賜可羣公嘆

青山百匝不留人空留諸生遮望眼白雲孤起越南天
向來恨身無羽翰下馬入門懷橘拜身今却在白雲邊
鶴髮鬢鬢堂上坐兒孫稱觴婦供果世間此樂幾人同
看我風前孤淚墮一盃送舟下水西我欲贈言無好詞
徑須喚起東廣微為伊重補南陔詩

嚴州

城府黃塵撲馬鞍一篙重探水雲寒耳邊眼底無公事
睡過嚴州二百灘

釣臺

山林城市兩塵埃邂逅人生有往來
各問此心安處住釣臺無意壓雲臺

富陽

不到江湖恰五年歛山青繞屋頭
邊富春渡口明人眼落日孤舟浪拍天

餘杭

春晚山花各靜芳從教紅紫送韶光
忍冬清馥薔薇醺

薰滿千村萬落香

插秧

種密移疎綠毯平行間清淺穀紋生誰知細細青青草
中有豐年擊壤聲

曬繭

隔離處處雪成窩牢閉柴荆斷客過葉貴蠶飢危欲死
尚能包裹一絲窠

次韻甄雲卿晚登浮丘亭

賓筵舊壓三千客
燕榭新高十二城
潑墨雲頭連樹暗
垂絲雨脚過溪生
葛巾羽扇吾身健
雪碗冰甌子句清
從此相從須痛飲
故應此事勝公榮

古風上知府秘書二首

神仙絕世立功行
聞清都玉符賜長生
薊雲遊紫虛鷄犬
爾何知偶舐藥鼎
餘身輕亦仙去罡
風與之俱俛視
舊籬落眇莽如積
蘇非無鳳與麟
終然似蟲魚微
物豈有命政爾謝
泥塗時哉適丁是
邂逅真良圖

大鵬上扶搖南溟聒天沸斥鷃有羽翼意滿蓬蒿裏不
如附驥蠅掣電抹荆薊誰云極么麼俛仰且萬里向來
庭戶間決起不踰尺飄飄託方便意氣乃如此物生未
可料旦暮倘逢世君看功名場得失一交臂

拄笏亭晚望

林泉隨處有清涼山遶闌干客自忙溪雨不飛虹尚飲
亂蟬高柳滿斜陽

桑嶺

迴腸山百盤揮手天一握俯驚危棧穿仰詫飛石落挽
輿如挽舟絕叫斷雙筇恠蔓纏枯槎瘠草披幽壑此豈
車馬路誰云強刊鑿人言遠遊好呼來試着腳

次景琳錄事贈別韻

放船鳴櫓便秦吳送別空煩長者車宿霧鎖山常冪冪
斷雲將雨忽疎疎高城五嶺花深處短棹三江木落初
賴得溪流通尺素蒲根仍有一雙魚

客中呈幼度

手板頭銜意已慵墨池書枕興無窮釀泥深巷五更雨
吹酒小樓三面風草色有無春最好客心去住水長東
今朝合有家書到昨夜燈花綴玉蟲

送汪聖錫侍郎帥福唐

承明纔入又南州重見旌旗照柁樓道義平生無捷徑
風波隨處有虛舟如公未可違文石稽古何妨欠碧油
我亦登門煩著錄此行無力為王留

長至日與同舍遊北山

歲晚山同色湖平霧不收寒雲低閣雪佳節靜供愁竹
栢森嚴立蒲荷索莫休瘦筇知脚力政爾耐清遊

次韻胡邦衡秘監

斯言向來立千古敢疵瑕有命孤蓬轉何心勁箭加人
窮名滿世天定客還家回首冥恩怨虛空不着花

送周子充左史奉祠歸廬陵

黃鵠飄然下九關江船載月客俱還名高豈是孤臣願
身退聊開壯士顏傾蓋當年真旦暮霑巾明日有河山

後期淹速都難料相對猶憐鬢未斑

送陸務觀編修監鎮江郡歸會稽待闕

寶馬天街路煙蓬海浦心非關愛京口自是憶山陰高
興餘飛動孤忠有照臨浮雲付舒卷知子道根深

見說雲門好全家住翠微京塵成歲晚江雨送人歸邊
瑣風雷動軍書日夜飛功名袖中手世事巧相違

送李仲鎮宰漂陽

相逢已嘆十年遲冷淡貧交又語離玉筍換班通籍後

黃梅吹雨送帆時月巖家世猶為縣

仲鎮方叔孫也

金瀨溪山

好賦詩喚起酸寒孟東野倒流三峽洗餘悲

次韻子永雪後見贈

雪瓊待伴半陰晴竟日簷冰溜雨聲九陌泥乾塵未動
南山石露塔猶明稍聞古語占農事便覺歸心勝宦情
想得村田來歲好瓦盆嘉釀灌愁城

與正夫朋元遊陳侍御園

沙際春風轉物華意行聊復到君家年年我是重來客

處處梅皆舊識花官減不妨詩事業地寒猶辦醉生涯
城中馬上那知此塵滿長裾席帽斜

正月十四日雨中與正夫朋元小集夜歸

燈市淒清燈火稀雨巾風帽笑歸遲月明想在雲堆處
客醉都忘馬滑時老去尊前花隔霧春來句裏鬢成絲
浮生不了悲歡事作劇兒童總未知

韓無咎檢詳出示所賦陳季陵戶部巫山圖詩仰
窺高作嘆息彌襟余嘗攷宋玉談朝雲事漫稱

先王時本無據依及襄王夢之命玉為賦但云
頽顏怒以自持曾不可以犯干後世弗察一切
溷以媒語曹子建賦宓妃亦感此而作此嘲誰
當解者輒用此意次韻和呈以資撫掌

瑤姬家山高挿天碧叢竒秀古未傳向來題目經楚客
名字經度我岷前是邪非邪莽難識喬林古廟常秋色
暮去行雨朝行雲翠帷瑤席知何人峽船一息且千里
五兩竿頭見幡尾仰窺仙館至今疑行人問訊居人指

千年遺恨何當申陽臺愁絕如荒村高唐賦裏人如畫
玉色頰顏元不嫁後來饑客眼長寒浪傳樂府吹復彈
此事牽連到溫洛更憐塵鞵有無間君不見天孫住在
銀濤許塵間猶作兒女語公家春風錦瑟傍莫為此圖
虛斷腸

次韵王夷仲正字同遊成氏園

秀巖堂上王東西把酒登臨望眼迷天宇四垂粘地近
海山一抹帶潮低絕知客好無塵事聊記吾曾有醉題

倚賴羣仙聯姓字他年誰敢一丸泥

是日諸公
令予題壁

送吳智叔檢詳直中秘使閩

抗章襍被豈公難已說高風立懦頑客路莫嫌河畔草
直廬須愛道家山秋生蓮浦船初泛春滿茶溪騎趣還
却訪故人西府舊定煩書札墮田間

次韻韓無咎右司上巳汎湖

休沐良辰不待晴徑稱閒客此間行春衫欺雨任教冷
病眼得山元自明抹黛濃嵐圍坐晚揉藍新渌沒篙清

棲鴉未到催歸去想被東風笑薄情

王園官舍睡起

公退閑閣卧官居如淨舫屋角斷虹飲日西楊柳黃官
來束我帶客去書滿床睡覺有忙事煮茶翻斷香

七月二日上沙夜泛

困倚船窓看斗斜起來雨露滿天涯亭亭宿鷺明菰葉
閃閃涼螢入稻花月下片雲應夜雨山根炬火忽人家
江湖處處無窮景半世紅塵老歲華

長沙王墓在閭門外

孫伯符

英雄轉眼逐東流
百戰工夫土一坯
蕎麥茫茫花似雪
牧童吹笛上高丘

次韻耿時舉王直之夜坐

庭葉翻翻鬧燈花
粟粟穰關山千里雁
風雨滿城鐘隴
上新登穀江頭舊熄烽
今年吾計得安穩
讀三冬

次韻馬少伊郁寂峯寄示同遊石湖詩卷三首

鏡面波光倒碧峰
半湖雲錦萬芙蓉
去年蕩槩香風裏

行傍石橋花正濃

紅皺黃團熟暑風甘瓜削玉藕玲瓏身謀已落園丁後
滿帽京塵日正中

得得來題小隱詩拂花縈柳畫船移湖邊好景春猶未
須到秋清月滿時

與長文正夫遊北山

柳岸松門勝處通馬蹄踏霧入空濛春光有力欺遊子
天色無情沒斷鴻雨脚遠連山脚暗杏梢斜倚竹梢紅

駝裘擁鼻吾衰矣年少猶嫌料峭風

寓直玉堂拜賜御酒

歸鴉陸續墮宮槐簾幙參差晚不開
小雨遂將秋色至長風時送市聲來
近瞻北斗璿璣次猶夢西山翠碧堆
慙愧君恩來甲夜殿頭宣勸紫金杯

李暉知縣作亭西湖上余用東坡語名之曰飲綠
遂為勝槩

芷葺蓮巢喚客遊蘆鞭席帽為君留
未論吹水堪添酒

且要移床學枕流
乍霽却陰梅釀雨
暫暄還冷麥催秋
石湖也似西湖好
煩向蒼煙問白鷗

送汪仲嘉待制奉祠歸四明分韻得論字

丹霄碧海眇高騫
厭直承明却自論
寶馬十年聽漏箭
扁舟一雨看潮痕
侍臣想憶松門遠
歸客還憐菊徑存
清潤要非山澤相
又煩一札下雲根

初約鄰人至石湖

窈窕崎嶇學種園
此生丘壑是前緣
隔離石上浮天水

當戶山橫匝地煙春入蒔田蘆綻筍雨傾沙岸竹垂鞭
荒寒未辦招君醉且吸湖光當酒泉

刈麥行

菊花開時我種麥桃李花飛麥叢碧多病經旬不出門
東陂已作黃雲色腰鎌刈熟趁晴歸明朝雨來麥帶泥
犁田待雨插晚稻朝出移秧夜食麩

壬辰九月十六日侵晨真率會石湖路中書事

白葛烏巾稱老農溪南溪北水車風稻頭的皪粘霜露

步入明珠翠網中

雙燕

底處雙飛燕銜泥上藥欄莫教驚得去留取隔簾看

春日三首

藥欄花暖小鴝眠雪白晴雲水碧天煮酒青梅寒食過
夕陽庭院鎖鞦韆

西窓一雨又斜暉睡起熏籠換夾衣莫放珠簾遮洞戶
從教燕子作雙飛

雙鯉無書直萬金
畫橋新綠一篙深
青蘋白芷皆愁思
不獨江楓動客心

汴河

指顧枯河五十年
龍舟早晚定疏川
還京却要東南運
酸棗棠梨莫翦然

雷萬春墓

在南京城南環以小塼
榜曰忠勇雷公之墓

九隕元身不隕名
言言千載氣如生
欲知忠信行蠻貊
過墓人人下馬行

宜春苑

狐塚獾溪滿路隅行人猶作御園呼連昌尚有花臨砌
腸斷宜春寸草無

州橋

州橋南北是天街父老年年等駕迴忍淚失聲詢使者
幾時真有六軍來

宣德樓

峽闕叢霄舊玉京御床

闕

迹忽縱橫他年若作清宮使

不挽天河洗不清

市街

梳行訛雜馬行殘
藥市蕭騷土市寒
惆悵軟紅佳麗地
黃沙如雨撲征鞍

漸水

黃流日夜向南風
道出封丘處處逢
紫蓋黃旗在湖海
故應河伯欲朝宗

舊滑州

大伾山麓馬徘徊積水中間舊滑臺漁子不知興廢事
清晨吹笛棹船來

翠樓

連袵成帷迓漢官翠樓沽酒滿城歡白頭翁媼相扶拜
垂老從今幾度看

臨洺鎮

竟日霜寒暮解圍融融桑柘染斜暉北人爭勸臨洺酒
云是棚頭得兔歸

真定舞

紫袖當棚雪髻凋
曾隨廣樂奏雲韶
老來未忍耆婆舞
猶倚黃鐘袞六么

內丘梨園

汗後鶯梨爽似冰
花身耐久老猶榮
園翁指示還三歎
曾共翁身見太平

望都

荒寺疎鐘解客鞍
由山東畔白煙寒
望都風土連唐縣

翁媼排門帶癭看

安肅軍

從古銅門控朔方
南城煙火北城荒
臺家抵死爭溇灤
滿眼秋蕪襯夕陽

燕賓館

九日朝天種落驩也
將佳節勸盃盤
苦寒不似東籬下
雪滿西山把菊看

龍津橋

燕石扶欄玉雪堆柳塘南北抱城迴西山剩放龍津水
留待官軍飲馬來

自石林回過小玲瓏巖竇益奇昔為富人吳氏所
有今一子尚幼檢校於官

一丘乃中虛洞穴四無礙卻略巖岫杳黝糾石狀怪蒼
牛飲前池碧潏灩微瀨雕鏤具百巧圖畫窘千態哀湍
寫壞磴凍雨濕空翠疎梅照草棘瘦竹枝蹊隧當時閭
閻子目力有塵外孤童貌難料奇事疑有待誰歟千金

捐來換把茅蓋不仙亦足豪衆垤皆纍塊我評北山遊
絕勝此無對玲瓏詎可小孰能為之大

乾道己丑守括被召再過釣臺自和十年前小詩
刻之柱間後五年自西掖帥桂林癸巳元日雪
晴復過之再用舊韻三絕

浮生渺渺但飛埃問訊星宮又獨來天上人間最高處
為君題作鬱蕭臺

拙疎何計補涓埃慙愧雙旌去又來三過溪門今老矣

病無脚力更登臺

界天山雪淨黃埃江上扁舟夜泛來
匝地東風勸椒酒
山頭今日是春臺

豫章南浦亭泊舟二首

繡檻臨滄渚牙樯插暮沙
浦雲沉斷雁江雨入昏鴉
野曠天何近春寒歲未華
朝來風一席隨處且浮家

閨歲花光晚霜朝草色荒
趁墟猶市井收潦再耕桑
客路東西懶江流日夜忙
長歌情不盡一酌醉滄浪

清江臺在臨郡西岡上張安國題榜

南來富壽岡春勝此蟠結岑岬戴南臺欄檻了風月蕭
灘曳長煙貝闕炯殘雪江流當帶橫練練浮木末天風
來無鄉萬里吹醉顙登臨信奇事忍凍亦癡絕故人春
夢覺遺墨秋蛇掣浮雲真可咤揮解酹空濶

初入湖南醴陵界

崖柳陰陰夾暝迷出山歡喜見平蕪一春客夢飽風雨
行盡江南聞鷓鴣


醴陵驛

綠水橋邊縣門前柳已黃人稀山木壽土瘦水泉香乍
脫泥中滑還嗟堠子長桂州何日到鼓枻上滄浪

初見山花

三日晴泥尚沒韉幾將風雨過年華湘東二月春纔到
恰有山櫻一樹花

宋詩鈔卷六十一



總校官庶吉士臣張能照
校對官庶吉士臣陳崇本
膳錄監生臣衛子忠

欽定四庫全書薈要

集部

宋詩鈔卷六十二

詳校官候選知縣臣吳甸華



欽定四庫全書薈要卷二萬三百十五

集部

宋詩鈔卷六十二

內閣中書舍人吳之振編

范成大石湖詩鈔中

湘江洲尾快風挂帆

船頭雪浪吼奔雷
十丈高帆滿意開
我自只憑忠信力
風應不為世情來
兒童屢惜峯巒過
將士猶教鼓角催
明日祝融天柱去
更煩先捲亂雲堆

泊湘江魚口灘

知時社燕語檣竿遊子奔波自鮮歡
趨客賣魚雙槳捷隔村沽酒小旗寒
瀟湘渾似日南落嶽麓已從天外看
好向風前收百丈卧聞三老報平安

馬鞍驛飯罷縱步

食飽勸輿馬散策步前岡意行踏芳草
蕭艾翳生香春事甚寂寥山桃帶松篁
游蜂入菜花此豈堪蜜房今年蝨出遲
柘葉分寸長好晴纔數日樂事未渠央

黃罷嶺

薄宦每違已茲行遂登危峻阪盪胸立恍若對鏡窺傳
呼半空響濛濛上煙霏木末見前驅可望不可追躋攀
百千盤有頃身及之白雲亘攬擷但覺沾人衣高木傲
燒痕葱蘢茁新萐春禽斷不到惟有蜀魄啼謂非人所
寰居然見鉏犁山農如木客上下翻以飛寧知有康莊
生死安嶮巇空室了無處恐尚槽巢棲安得拔汝出王
路方清夷

衡永之間山路艱澁薄晚吏卒闕云漸近祈陽路
已平夷皆有津津之色

朝登赤土嶺暮入黃泥谷春江弄花月歸夢恍在目覺
來行路難杜宇叫高木凹中泥沒踝凸處石齧足坐輿
我尚病想見肩輿僕衡陽復祈陽可暫不可宿晚來出
前岡路坦亭堠促將士走相賀喜色如膏沐人生本無
悶逆境要先熟不從憂患來安識平為福夷途不常遇
歷險始知足

書浯溪中興碑後

并序

乾道癸巳春三月余自西掖出守桂林九日渡湘江
遊浯溪摩娑中興石刻洎唐元和至今遊客所題竊
謂四詩各有定體頌者美盛德之形容以其成功告
于神明者也商周魯之遺篇可以槩見今元子乃以
魯史筆法婉辭含譏蓋之而章而後來詞人復發露
之則夫磨崖之碑乃一罪案何頌之有竊以五十六
字刻之石旁與來者共商畧之此詩之出必有相詬

病者謂不合題破次山碑此亦俗習因陋不能越拘攣之見耳余義正詞直不暇卹也

三頌遺音知者希
丰容寧有刺譏辭
絕憐元子春秋法
却寓唐家清廟詩
歌詠當諧琴搏拊
策書自管壁純疵
紛紛健筆剛題破
從此磨崖不是碑

宿清湘城外田家

驅馬力猶彊
就牀身始疲
浮浮雲拂帳
滴滴水鳴籬
未熟燈前夢
間尋道上詩
湘中多夜雨
客枕最先知

次韻郭季勇機宜雪觀席上留別

絕勝尊前萬事休，縱非吾土且登樓。
山迎雨脚俄飛過，風約江聲欲倒流。
野水新堪添酒面，夕陽依舊滿簾鉤。
凭欄從此遲歸鞅，能及中秋對月不。

次韻許季韶通判雪觀席上

把酒臨風瑞露傾，瓊漿何用謁雲英。
捲簾雨脚銀絲挂，倚杖江頭綠漲生。
嶺海一涼蘇暑病，山林千籟試秋聲。
茲遊奇絕忘羈宦，慙愧煙中短棹橫。

送周直夫教授歸永嘉

青燈相對話儒酸老去羈遊自鮮歡
昨夜榕溪三寸雨今朝桂嶺十分寒
知心海內向來少解手天涯良獨難
一笑不須論聚散少焉吾亦跨征鞍

贈趙廉州

馬羣雜踏草蒙茸刮目權竒一洗空
天末也應月色到歲寒聊得酒尊同
梅花夜夜湘南雨榕葉年年漠北風
少待佳晴看山去玉簪高插翠雲叢

食罷書事

甲子霖涔雨東南濕
蟄風荔枝梅子綠
萱寇杏花紅
捫腹蠻茶快扶頭
老酒中荒隅經歲客
土俗漸相同

次韵平江韓子師侍郎見寄三首

自古四愁湘水深
誰將城郭啓山林
有情碧嶂團樂統
無數朱樓縹緲臨
蚺鼓揭天驚客座
象鑿航海厭蠻琛
三千客路長安遠
故舊書來直萬金

靈泉杖屨浙江頭
經濟長懷尚典州
堂上讀書朝氣爽

臺前呼月海光浮交情尺素勤雙鯉筆力枯松挽萬牛
已把三章翻樂府為君擊節變蠻謳

前年衝雪過雙溪風帽泥羈騎吹隨爛醉依前途錦瑟
好音惟是欠黃鸝功名未試玉璫瑛離別頻傾金屈卮
疇昔北征煩吉夢南征合有夢歸時

水鄉酌別但能之主管能之將過石康

南郭河橋市井喧綠荷香處有江天一簾梅雨鑪煙外
三疊陽關燭淚前馬耳西風君並海船頭北渚我歸田

後期直恐參商似且醉金槽四十絃

燕堂書事

歲稔齊鈴聞年深屋豎推猩爭雷瓦過螳化雨窓來盡
日風長籟無時地不梅耳邊情話少笑口若為開

酒邊二絕

團扇香中嫋嫋風斷腸聲裏看羞紅不須過處催乾盞
聽徹歌頭盞自空

日長繡倦酒紅潮閒束羅巾理六么新樣築毬花十八

丁寧小玉謾吹簫

甘雨應祈三首

晚稻成苞未肯肥
鵲鳩啼曉雨來時
黃紬被冷初眠覺
先向芭蕉葉上知

秋日雖蒙霖霖沾
泥塵終恨太廉纖
今朝健起巡簷看
恰似廬山看水簾

高田一雨免飛埃
上水網船亦可催
說與東江津吏道
打量今晚漲痕來

畫工李友直為余作冰天桂海二圖冰天畫使北
方渡黃河時桂海畫佛子遊巖道中也戲題

許國無功浪着鞭天教飽識漢山川酒邊蠻舞花低帽
夢裏胡笳雪沒羈收拾桑榆身老矣追隨萍梗意茫然
明朝重上歸田奏更放岷江萬里船

甲午除夜猶在桂林念至一弟使北今夕當宿燕
山會同館兄弟南北萬里感悵成詩

把酒新年一笑非鵲鴿原上巧相逢墨濃雲瘴我猶住

席大雪花君未歸萬里關山燈自照五更風雨夢如飛
別離南北人誰免似此別離人亦稀

乙未元日用前韻書懷今年五十矣

浮生四十九俱非樓上行藏與願違縱有百年今過半
別無三策但當歸定中久已安心境飽外何須食肉飛
若使一丘并一壑還鄉曲調盡依稀

再用前韻時被命帥蜀

休論今昨總皆非世味誠甘與我違蜀道雖如履平地

杜鵑終勸不如歸三冬自若生毛穎一夢微官陪蜚飛
夜久南枝翻倦鵲芒芒月白衆星稀

施元光在崑山病中遠寄次韻答之

四海飄蓬客舍邊幾多雲水與風煙絕無旅力驅長轡
空有孤忠誓大川參井忽隨征馬上斗牛應挂故山前
親交情話知何許詩到天涯喜欲顛

鐸筓

渠江自海陽至縣迺瀾迤狂瀾既奔傾中流遇鐸筓分

為兩道開東灘北湘水至今舟楫利楚粵經萬里人謀
效天造史祿所經始無謂秦無人虎鼠用否耳紫藤纏
老蒼白石溜清泚是間可作社牲酒百世祀修慶者誰
歟配以臨川季

清湘縣郊外雜花盛開有懷石湖

午行清湘縣妍暖春事嘉柴關開桃李冥冥一川花故
園豈少此愈此百倍加我寧不念歸顧作朱木鴉百年
北窓涼安用天一涯君恩重喬嶽敢計征路賒鄉心與

官身鑿枘方聲牙橘柚走珍貢何如繫匏瓜明當復露
奏天日臨幽遐倘許清河使曳尾還汙邪

珠塘

林茂鳥烏急坡長驢馱鳴坐輿猶足痺負笈想肩頽廢
廟藤遮合危橋竹織成路傍行役苦隨處有柴荆

題湘山大施堂

重倚春林淚竹枝南遊風物髣成絲難尋桂海千峯夢
更了湘山一段奇來去別無心外法行藏休問塔中師

若論大施門前事竿木遊場且賦詩

深溪舖中二絕追路寄呈元將仲顯二使君

賀州歸去柳州還分路千山與萬山把酒故人都別盡
今朝真箇出陽關

祇有南風捲路塵斷無南客送車輪故人合在瀟湘見
却見瀟湘別故人

湘口夜泊南去零陵十里美營水來自營道過零
陵下湘水自桂林之海陽至此與營會合為一

江

我從清湘發源來直送湘流入營水故人亭前合江處
暮夜檣竿矗沙尾卻從湘口望湘南城郭山川恍難紀
萬壑千巖詩不徧惟有蒼苔痕屐齒三年瘴霧亦奇絕
浮世登臨如此幾湖南山色夾江來無復瑤簪挿天起
陂陀狠石蹲清漲淡蕩光風浮白芷騷人魂散若為招
傷心極目春千里我亦江南轉蓬客白鳥愁煙思故壘
遠遊雖好不如歸一聲鷓鴣花如洗

題嶽麓道卿臺

山外江水黃江外滿城綠城外杳無際天低到平陸長
煙貫楚尾遠勢帶吳蜀故園東北望遊子攔干曲

連日風作洞庭不可渡出赤沙河

金沙堆前風未平赤沙河邊波不驚客行但逐安穩去
三十六灣漲痕生滄洲寒食春亦到荻芽深碧萋芽青
汨羅水飽動荆渚嶽麓雨來昏洞庭大荒無依飛鳥絕
天地惟有孤舟行慷慨悲歌續楚些彷彿幽瑟迎湘靈

黃昏慘淡艤極浦雖有漁舍無人聲冬湖落濡此暫住
春潦怒漲隨偏耕吾生一葉寄萬里況復搖落浮滄溟
漁蠻尚自有常處羈宦方汝尤飄零

泊衡州

客裏仍哦對雨吟夜來星月曉還陰空江十日無春事
船到衡陽柳色深

步入衡山

應有人家住隔溪綠陰亭午但聞鷄松根當路龍筋瘦

竹笋滿山鳳尾齊墨染安雲猶似瘴絲來小雨不成泥
更無騎吹喧相逐散誕間身信馬蹄

四明人董嶧久居嶽市乞詩

祝融峯下雨逢春雨宿風飡老病身莫笑五湖萍梗客
海邊亦有未歸人

鼎湖

漂泊離巢燕彎跼負殼蝸瘦嫌莞席硬老覺畫屏舍報
道帆當落傳呼鼓已撾且投人處宿未到已聞臺

安鄉縣西晚泊

水濶鳥烏倦墟寒僮僕饑一灣村縣過百折暮江遲曉
夢孤燈見春陰病骨知簡書寧不畏旅力奈先疲

孫黃渡

捨舟從陸更間關徑仄仍荒亦未乾棘刺近人牢閉眼
泥塗兀馬緊扶鞍茶山盜藪路程惡麥隴人家懷抱寬
擔僕輿夫盡劬瘁病翁那得更加餐

發荊州

初上蓬籠竹竿船始知身是劍南官沙頭沽酒市樓暖
徑步買薪江墅寒自古秦吳稱絕國于今歸峽有名灘
千山萬水垂垂老只欠天西蜀道難

虎牙灘

傾崖溜雨色慘淡水墨畫辛夷碎花懸魂木老藤挂翠
莽楚甸窮黃流蜀江下一灘今始嘗三峽此其亞雨點
鼓士摻雲騰挽夫跨驚心度石林破眼見村舍牛眠草
色裏犬吠竹林罅步頭可樣船安穩睡殘夜

初入峽山效孟東野

峽山偏而峻峽水湍以礫峽草如毳毛峽樹多樛枝峽禽惟杜鵑血吻日夜啼峽馬類黃狗不能長鳴嘶峽曉虎跡多峽暮人跡稀峽路如登天猿鶴不能梯僕夫負屨哭我亦呻吟悲悲吟不成章聊賡峽哀詩

蛇倒退

山前壁如削山後崖復斷向吾達隴首如海到彼岸那知下嶺處慄甚履冰戰牽前帶相挽縮後衣盡綻健倒

轍尋丈徐行塵分寸上疑緣竹竿下劇衮金彈豈惟蛇
退舍飛鳥望崖反稍喜一徑平猶有千石亂仍逢新燒
畚約畧似耕畔心知人境近顰眉百憂散山民茅數把
鬼質犢子健腰鏡走迎客再拜復三嘆謂匪人所蹊官
來定何幹倘為饑火驅平地豈無飯意者官事迫如馬
就羈絆我乃不能答付以一笑粲

大丫隘

峽行五程無聚落馬頭今日逢耕鑿麥苗疎瘦豆苗稀

椒葉尖新柘葉薄
家家婦女布纏頭
背負小兒領垂瘤
山深生理卻不乏
人有銀釵一雙挿

麻線堆

峽口驛前大山崛起舊路攀援而上縈紆如線十五
年前浮圖德寶始沿澗伐木作新路不復登山余觀
峽路皆未嘗經修感德寶之事作麻線堆詩一首以
風變路使者及歸峽二州長吏沈葉管熊四君

雲木盪胸起鬱叢一峯危上有路千折縈縷如縈絲是

為麻線堆厥險天下稀偏仄容半足顛墜寧復稽騰猱
尚愁苦遊子將安之浮屠德寶者悲智緒等慈隨山刊
古木尋壑得長磯與梁捷飛度布石綿階梯自從新路
改重趼無齋咨縣有孫少府琬琰劉文詞勿云此事小
惟有行人知况觀峽山路由來欠平治官吏既弗跡誰
肯深長思天險固自若當令路成蹊土工運畚鍤石工
操鑿椎烈火收礲确築沙填隙巖多用百夫力遠無五
旬期但冀米鹽給不煩金幣支非客敢竊議道旁詢旄

倪身雖雪山戍亦願助毫釐工費嗟小哉政須賢有司
東有管夷陵西有葉秭歸上維沈隱侯夔臺今吏師下
維熊繹孫長材佐州麾豈吾金閨彥不如林下緇懸知
議克合了此一段奇舟楫避潢潦置郵疾飛馳憧憧吳
蜀客來往當無時仍磨鑕天石大書四賢詩不佞願秉
筆遠繼峽口碑

判命坡

鑕天嶺上已飛魂判命坡前更駭聞側足二分垂壞磴

舉頭一握到孤雲微生敢列千金子後禍猶幾萬石君
早晚北窓尋噩夢故應含笑老榆枌

千石嶺

晨光挂高嶺晴色媚遠客哀湍吼叢薄宿霧裊絕壁露
重蘚花紫風來蓬背白迷山朴渥跳飲澗於菟迹層巔
多朽木迤磴有飛石不知山幾重杳杳入叢碧

四十八盤

詰曲不前如宦拙歌傾當面似交難若將世路比山路

世路更多千萬盤

入秭歸界

山根繫馬得漿家
采入窮鄉事可嗟
蚯蚓崇人能作瘴
茱萸隨俗強煎茶
幽禽不見但聞語
野草無名都著花
窮窳崎嶇殊未艾
去程方始問三巴

歸州竹枝歌二首

東鄰男兒得湘纍
西舍女兒生漢妃
城郭如村莫相笑
人家閭閻似渠稀

東岸艤船拋石門西山炊煙連白雲竹籬茅舍作晚市
青蓋黃旗稱使君

巴東峽口

水宿頻歌側徒行又險艱舟危神女峽馬瘦鬼門關照
夜燒畚隴緣雲種窄山催成頭雪白休說髻絲斑

初入巫峽

鑽火巴東岸縱金峽口船束江崖欲合漱石水多漩卓
午三竿日中間一罅天偉哉神禹跡疏鑿此山川

巫山高

并序

余舊嘗用韓无咎韻題陳季陵巫山圖考宋玉賦意
辨高堂之事甚詳今過陽臺之下復賦樂府一首世
傳瑤姬為西王母女嘗佐禹治水廟中石刻在焉

濕雲不收煙雨霏峽船作灘梢廟磯杜鵑無聲猿叫斷
惟有饑鴉迎客飛西真功高佐禹跡斧鑿鱗皴倚天壁
上有瑤簪十二火下有黃湍三百尺蔓花蚪木風煙昏
蘚珮翠帷香火寒霧旂飄忽定何許時有行人開廟門

楚客詞章元是諷紛紛餘子空嘲弄玉色顚顚不可干
人間錯說高唐夢

刺瀆淖

并序

瀆淖盤渦之大者峽江水壯則有之或大如一間屋
相傳水行峽底遇暗石則瀆起已而下旋為窩然亦
未嘗有定處或無故突然而作叵測也舟行遇之小
則欹傾大則與齋俱入險惡之名聞天下

峽江饒暗石水狀日千變不愁灘瀧來但畏瀆淖見人

言盤渦耳夷險固有間仍于非時作未可一理貫安行

方熨穀無事忽翻練突如湯鼎沸翕作茶磨旋勢迫中
成窪怒霽外始暈已定稍安慰儵作更驚眩漂漂浮沫
起疑有潛鯨喫勃勃駭浪騰復恐蟄鰲扑篙師瞪視魄
灘戶呀雨汗浚巡怯大敵勇往決鏖戰幸免與齧入還
憂似蓬轉驚呼招竿折奔救竹竿斷九死船頭爭萬苦
石上牽旁觀競薄冰撇過捷飛電前余叱馭來山險固
嘗徧今者擊楫誓豈復憚波面澎澎三峽長颭颭一葦

亂既微掬指忙又匪科頭漫天子賜之履江神敢吾玩
但催疊鼓轟往助雙櫓健

嘲峽石

并序

峽山江濱亂石萬狀極其醜恠不可形容舉非世間
諸所有石之比走筆戲題且以紀異

峽山狼無情其下多醜石頑質賈憎垂傀狀發笑啞粗
類墳壤黃沈漬鐵矢黑或如溝泥浣或似東壁坼堆疑
聚廩粟陷若壞城甃槎牙鏤朽木狼籍委枯骼礪砢色

羸蚌淋漓錮鉛錫縱紋瓦溝隴橫疊衣摺襞鱗皴斧鑿
餘炊甯蹴踏力云何清淑氣孕此譎詭跡我本一丘壑
嗜石舊成癖端溪紫琳腴洮河綠沉色階冊截肪膩泗
磬鳴球擊嵌空太湖底偶立韶江側真陽剺千巖營道
剺寸碧倦遊所閱多未易一二籍矚來茲山下刺眼苦
未覲或云峽多材奇秀鬱以積絕代昭君村驚世屈原
宅東家兩兒女氣足豪萬國山石何重輕奚暇更融液
我亦味其言作詩曉行客

勞畬耕 并序

畬田峽中刀耕火種之地也春初斫山衆木盡蹶至
當種時伺有雨候則前一夕火之藉其灰以糞明日
雨作乘熱土下種即苗盛倍收無雨反是山多磽确
地方力薄則一再斫燒始可藝春耕麥豆餅餌以度
夏秋則粟熟矣官輸甚微巫山民以收粟三百斛為
率財用三四斛了二稅食三物以終年雖平生不識
秔稻而未嘗苦饑余因記吳中號多嘉穀而公私之

輸顧重田家得粒食者無幾峽農之不若也詩以勞之

峽農生甚艱斫畚大山巔赤埴無土膏三刀財一田顧
其穴居智占雨先燎原雨來亟下種不爾生不蕃麥穗
黃剪剪豆苗綠芊芊餅餌了長夏更遲秋粟繁稅畝不
什一遺秉得饜餐何曾識秔稻捫腹常果然我知吳農
事請為峽農言吳田黑壤腴吳米玉粒鮮長腰瓠犀瘦
齊頭珠顆圓紅蓮勝彫胡香子馥馥蘭或收虞舜餘或

自占城傳早秈與晚秈爛炊甌甌間

長腰米狹長亦名箭子齊頭白圓淨

如珠紅蓮色微赤香子亦名几里香斗米入數合作飯芳香滿紫舜玉稻焦頭無須俗為替叟燒種以與之占城種來自海南龍種租禾價最賤以上皆吳中米品也不辭春養禾但畏秋輸官

姦吏大雀鼠盜胥衆螟螣掠剝增釜區取贏折緡錢兩種致一斛未免催租瘢重以私債迫逃屋無炊煙晶晶雲子飯生世不下咽食者定游手種者長流涎不如峽農飽豆麥終殘年

巫山縣

自此復登陸至夔門縣前掉石灘最險登岸以過舟謂之盤灘城樓對高唐門此去

瞿塘不百里縣人以郭西流石堆
為水信流石沒則灝瀕如馬矣

借馬巫山縣盤舟掉石灘梅肥朝雨細茶老暮煙寒門
對高唐起江從灝瀕難流堆三尺在旅夢一枝安

燕子坡

大山如牆缺小山如塚累衆山直下看方知此峯危木
末見夔峽一溝盡春泥中有天下嶮造化真兒嬉峰頂
不滿笑舟中鬚成絲登高尚超覽況乃絕俗姿

夔州竹枝歌九首

五月五日嵐氣開南門競船爭看來雲安酒濃麴米賤
家家扶得醉人回

赤甲白鹽碧叢叢半山人家草木風榴花滿山紅似火
荔枝天涼未肯紅

新城果園連瀼西枇杷壓枝杏子肥半青半黃朝出賣
日午買鹽沽酒歸

癭婦趁墟城裏來十五五市南街行人莫笑女粗醜
兒郎自與買銀釵

白頭老媪簪紅花黑頭女郎三髻了背上兒眠上山去
採桑已間當採茶

百衲畬山青間紅粟莖成穗豆成叢東平屯田秔米軟
不到貧人飯甑中

白帝廟前無舊城荒山野草古今情只餘峽口一堆石
恰似人心未肯平

灩澦如襍瞿塘深魚復陣圖江水心大昌鹽船出巫峽
十日泝流無信音

當筵女兒歌竹枝一聲三疊客忘歸
萬里江邊有船到
繡羅衣服生光輝

雲安縣

春暮子規少日斜紅鵲飛兩山多布水
一畝幾柴扉
吐無窮壞人行不斷磯巴陽昨夜雨灘上水先肥

杜子美詩

云涪萬無杜鵑雲安詩云終日子規啼今萬州界固不
聞杜鵑而雲安已自少矣紅鵲飛時滿背純赤或云即
黃鶴也峽中蚯蚓之威無如雲安江濱漬壤戢戢無際
又多巨石岸有一石長里許者杜子美詩云禹功多斷
石其實甚長兩山間雨後
瀑泉數十百處尤可觀

萬州

晨炊維下巖晚酌檣南浦波心照州榜雲脚響衙鼓前

山如屏牆得得正當戶西江朝宗來循屏復東去

此萬州形

勢也惟親歷者當知此言之工

官曹倚巖樓市井喚船渡瓦屋仄石磴

猿啼鬧人語別核杏餘酸連枝茶賸苦窮鄉固瘠薄陋

俗亦寒窶

土人賣杏皆先剔其核取仁以為藥也土茶甚苦不簡枝葉雜菜更煎之

營營謀

食艱寂寂懷甄訴昔聞吏隱名今識吏隱處

峯門嶺遇雨泊梁山

窮鄉誰與話悲酸
駐馬看雲強自寬
酒力無端妨宿病
詩情不淺任塵官
虎狼地僻炊煙晚
風雨天低夏木寒
行盡峯門千萬丈
梁山鼓角報平安

邗郊驛大雨

暮雨連朝雨長亭又短亭
今朝騎馬怕平日繫船聽竹
葉垂頭碧秧苗滿意青
農疇方可望客路敢遑寧

墊江縣

青泥沒髀僕頻驚
黃漲平橋馬不行
舊雨雲招新雨至

高田水入下田鳴百年心事終懷土一日身謀且望晴
休入中州爭米市暝鴉同宿塾江城

巾子山又雨

百日籃輿困跼踰三晨汎坂兀躋攀晚晴幸自塾江縣
今雨奈何巾子山樹色于人殊漠漠雲容憐我稍班班
如今只憶雪溪句乘興而來興盡還

鄰山縣

山頂噓雲黑似煙脩篁高柳其昏然鳥啼一夜勸歸去

誰道東川無杜鵑

沒水舖晚晴月出曉復大雨上漏下濕不堪其憂

晚色燾微暖似薰兒童歡喜走相聞無端星月照濕土

依舊山川生雨雲

吳諺口星月照濕土明朝依舊雨蓋雨後微晴星月燦然必復雨占之每

驗旅枕夢寒淙屋漏征衫朝潤冷鑪熏快晴信是行人

願又恐田家曝背耘

金山嶺

阪峻身頻偃崖深首屢回雲浮平地出路拂半天來但

閱關山過都忘歲月催湘南初上馬猶插早春梅

明日至鄰水又雨

昨日方無雨今朝又不晴
滿山皆履齒隨處有泉聲
頗怪陰霖差應催老病成
泥塗千騎士與我共勞生

望鄉臺

千山已盡一峯孤立馬行人莫疾驅從此蜀川平似掌
更無高處望東吳

早晴發廣安軍晚宿萍池村莊

夜雨洗煩蒸曉風薦清穆雲頭墮鐵山日脚迸金瀑暑
塗一日涼遠客萬事足羈人正奔波觀者何陸續翠蓋
立嚴粧青裙行跣足俗陋介南徼物華入東蜀竹萌苦
已青弱子酸猶綠脩蘆密成籬直柏森似纛泥乾馬蹄
鬆路坦亭堠速暮投何人庄窓戶暗脩竹

巴蜀人好食生蒜臭不可近頃在嶠南其人好食
檳榔合螞灰扶留藤一名萋藤食之輒昏然已
而醒快三物合和唾如膿血可厭今來蜀道又

為食蒜者所薰戲題

旅食諳殊俗堆盤駭異聞
南食仄薦螭巴饌菜先葷
幸脫薑藤醉還遭葫蒜薰
絲蓴鄉味好歸夢水連雲

小溪縣

宿麥千平隴橫槎一小溪
梓花紅綻碎粟穗綠垂低
村婦猶多跣山猿遂少啼
東州雖已過錦里尚雲西

曉發飛鳥晨霞滿天少頃大雨
吳諺云朝霞不出
門暮霞行千里驗之信然戲紀其事

朝霞不出門暮霞行千里今晨日未出曉氣散如綺心
疑雨再作眼轉雲四起我豈知天道吳農諺云耳古來
占霧霓說者類恢詭飛雲走羣羊停雲浴三豸月當天
半宿風自少女起爛石燒成香汗礎潤如洗逐婦鳩能
拙穴居狸有智蜉蝣強知時商羊與聞計埴鳴東山鶴
堂審南柯蟻或加陰石鞭或議陽門閉或云逢唐變或
自換甲始刑鷲與象龍聚訟非一理不如老農諺響應
捉如鬼哦詩敢夸博聊用醒午睡

九月十九日衙散回留火將及幕屬飲清心堂觀

晚菊分韻

甲光射曾雲雨脚不敢到西山明古雪秋日一竿照先
偏井絡密後拒參旗掉分弓滴博平鳴劍伊吾小君看
天山箭狐兔何足了開邊吾豈敢自治有餘巧歸來翠
帷卷聊共黃花笑雖無落帽風亦復接羅倒餘閒校筆
陣刻燭龍蛇掃毛錐乃更剪我亦鼓旗譟

冬至日銅壺閣落成

走徧人間行路難，異鄉風物雜悲歡。
三年北戶梅邊暖，萬里西樓雪外寒。
已辨鬢霜供歲籥，仍拚髀肉了征鞍。
故園雲物知何似，試上東樓且北看。

十二月十八日海雲賞山茶

追趁新晴管物華，馬蹄鬆快帽簷斜。
天南臘盡風晞雪，冰下春來水漱沙。
已報主林催市柳，仍從掌故問山茶。
豐年自是驩聲沸，更著牙前畫鼓撾。

雨後東郭排岸司申梅開方及三分戲書小絕令

一面開燕

雨入南枝玉蕊皴合江雲冷凍芳塵司花好事相邀勒
不著笙歌不肯春

鞭春微雨

旂勝絲絲雨笙歌步步塵一年新樂事萬里未歸人雲
薄竟慳雪酒濃先受春送寒東作近慙愧耦耕身

丙申元日安福寺禮塔

士女燃香挂旂以禳兵火之灾

嶺梅蜀柳笑人忙歲歲椒盤各異方耳畔逢人無魯語

蜀人鄉音極難解其為京洛音輒謂之魯語既又諱之尤可笑也

鬢邊隨我是吳霜新

年後飲醪酥酒故事先燃犀堵香石笋新街好行樂與民同處且逢場

初四日東郊觀麥苗

去歲秋霖麥下遲臘殘一雪潤無泥相將飽喫滹沱飯
來聽林間快活啼

櫻桃花

借暖衝寒不用媒
勻朱勻粉最先來
玉梅一見憐癡小
教向傍邊自在開

再出東郊

晚景增年慣
官身作客諳
大都緣偶熟
豈是性能堪
昔者開三徑
他時老一龕
越溪親種竹
芸綠想氤氲

上巳前一日學射山萬歲池故事

北郊征路記前迴
三尺驚塵馬踏開
新漲忽明多病眼
好風如把及時杯
青苗麥隴平平去
疎密棊林整整來

遊騎不知都幾許長堤十里轉輕雷

寶相花

誰把柔條夾砌栽壓枝萬朵一時開為君也著詩收拾
題作西樓錦被堆

四月十日出郊

約束南風徹曉忙收雲捲雨一川涼漲江混混無聲綠
熟麥騷騷有意黃吏卒遠時間信馬田園佳處忽思鄉
鄰翁萬里應相念春晚不歸同插秧

晚詣三井觀

路轉市聲遠，寬間古城東。
適從紅塵來，忽入蒼煙叢。
槿心傾濃露，茅葉翻微風。
秋陽澹籬落，殘暑不必攻。
野老熟睡起，日高首如蓬。
官身騎官馬，君應笑龍鍾。

秋雨快晴靜勝堂席上

一笑憧憧雁，驚行簿書堆。
裏賦秋陽心，如墜絮沾泥。
懶身似飛泉，激石忙雨後。
蹲鴟先稻熟，霜前浮蟻鬪。
棖香天涯節，物遮愁眼且復隨。
鄉便入鄉。

新涼夜坐

吏退焚香百慮空，靜聞蟲響度簾櫳。
江頭一尺稻花雨，隄外三更蕉葉風。
日日老添明鏡裏，家家涼入短檠中。
簡編燈火平生事，雪白眇昏奈此翁。

秋老四境雨已沛，然晚坐籌邊樓。
方議祈晴樓下，忽有東界農民數十人訴山田卻要雨。
須長吏致禱感之作詩。

歲晚羈懷有所思，秋來病骨最先知。
鏡中公案已甘老。

紙上課程休諱癡西堰頗聞江漲急東山猶說雨來遲
錦城樂事知多少憂旱憂霖感盡眉

有懷石湖舊隱

浩蕩沙鷗久倦飛推頽櫪馬不勝鞿官中風月常虛度
夢裏關山或暫歸橘社十年霜欲飽鱸江一雨水應肥
冷雲著地塘蒲晚誰為披簑暖釣磯

晚步宣華舊苑

喬木如山廢苑西古溝疎水靜鳴池吏兵憲罕番更後

樓閣崔嵬欲暝時有露冷螢猶照草無風驚雀自遷枝
歸來更了塵書債目青昏花獨穗垂

西樓秋晚

樓前處處長秋苔俛仰璿杓又欲回殘暑已隨梁燕去
小春應為海棠來客愁天遠詩無託吏案山橫睡有媒
晴日滿窓鳬鶩散巴童來按鴨鑪灰

明日分弓亭按閱再用西樓韻

眼看白露點蒼苔歲月飛流首屢回老去讀書隨忘却

醉中得句若飛來聞鷄午夜猶能舞射雉西郊不用媒
自笑支離聊復爾丹心元未十分灰

丁酉重九藥市呈座客

余于燕山首句云萬里漢家使桂林云萬里漢都護
成都云萬里橋邊客今歲倦遊賦此自戲

莫向登臨怨落暉自緣羈宦阻歸期年來厭把三邊酒
此去休哦萬里詩烏帽不辭歌短髮黃花終是欠東籬
若無合坐揮毫健誰解西風楚客悲

十一月十日海雲賞山茶

門戶謹呼十里村臘前風物已知春
兩年池上經行處
萬里天邊未去人
客鬢花身俱歲晚
粧光酒色且時新
海雲橋下溪如鏡
休把冠巾照路塵

二月一十七日病後始能扶頭

複幕重簾苦見遮
暮占棲雀曉占鴉
殘燈煮藥看成老
細雨鳴鳩過盡花
心為早衰元自化
髮從無病已先華
更蒙厲鬼相捉唱
此去山林屬當家

病中聞西園新花已茂及竹筵皆成而海棠亦未過

梅塢桃蹊斫竹初三旬高卧信音疎春雖與病無交涉
雨莫將花便破除祇合蘧蘧隨夢去何須咄咄向空書
頗聞蜀錦猶相待去歲今朝已雪如

枕上

一枕經春似宿醒三衾投曉尚淒清殘更未盡鴉先起
虛幌無聲鼠自驚久病厭聞銅鼎沸不眠惟望紙窓明

推顏豈是功名具
燒藥爐邊過此生

初履地

扶頭今日強冠簪
餘燼收從百戰酣
長脰閣軀如瘦鶴
衝風奪氣似枯柟
客來慵按懶殘涕
老去寒同彌勒龕
何處更能容結習
任教花雨落毵毵

病起初見賓僚時上疏丐祠未報

浪將冠服衣猿狙
因病偷閒稍自如
時有好懷誇得句
畧無情語怕回書
邊城晏閉休傳箭
村巷春遊未荷鉏

追北良辰公事少天恩倘許賦歸歟

三月十九日極冷

誰勒餘寒不放迴春深猶暖地爐灰鄉心忽向燈前動
夜雨先從竹裏來鷓鴣已如鶯百轉酴醾那復雪千堆
調糜煮藥東風老慙愧茶甌與酒杯

入崇寧界

桑間三宿尚回頭何況三年濯錦遊草草郢筒中酒處
不知身已在彭州

懷古亭

朝來寫得故人書
雙鯉難尋雁亦無
付與離堆江水去
解從陴縣到成都

過青城題索橋

以竹繩為之

織簾勾鋪面排繩
强架空染人高曬
帛獵戶遠張罾
薄薄難承雨翻翻
不受風何時將蜀
客東下看垂虹

上清宮

歷月捫參興未闌丹梯通處更躋攀冥濛蜀道一雲氣
破碎岷山千髻鬟但覺星辰垂地上不知風雨滿人間
蝸牛兩角渾如夢更說紛紛觸與蠻

最高峯望雪山

大面峯頭六月寒神燈收罷曉雲班浮空忽湧三銀闕
云是西天雪嶺山

青城縣何子方使君同年園池

檉塍芋隴意中行浩蕩薰風不計程雨脚背人歸玉壘

江聲隨馬入青城五橋今日新知路千佛當年舊綴名
水竹光中同一笑丐君荷露濯塵纓

次韻陸務觀編修新津遇雨不得登脩覺山徑過
眉州三絕

脩覺一望可見劔門

送客多情難語離僕夫無情車載脂平生漂泊知何限
少似新津風雨時

離合紛紛怕遠遊遠遊仍怕賦登樓何須一望三千里

望盡西州轉更愁

雨後墓頭山色開
玻璃江清已可盃
綠荷紅芰香四合
又入芙蓉城裏來

次韻陸務觀慈姆巖別二絕

送我彌旬未忍回
可憐蕭索把離杯
不辭更宿中巖下
投老餘年豈再來

明朝真是送行人
從此關山隔故情
道義不磨雙鯉在
蜀江流水貫吳城

玻璆江一首戲效陸務觀作

玻璆江頭春水深別時沄沄流到今祇言日遠易排遣
不道相思翻苦心烏頭可白我可去菖花易青君易尋
人生若未免離別不如碌碌無知音

余與陸務觀自聖政所分袂每別輒五年離合又
常以六月似有數者中巖送別至揮淚失聲留
此為贈

宦塗流轉幾沉浮鷄黍何年共一丘動輒五年遲遠信

常于三伏話羈愁月生後夜天應老淚落中巖水不流
一語相聞仍自解除書聞已趣刀頭

萬景樓

山谷來遊時未有此樓也

左披九頂雲右送大我月殘山剩水不知數一一當樓
供勝絕玻瓈濯錦遙相通拈麾大渡來朝宗川靈胥命
各東去我亦順流呼短篷詩無傑語慙風物賴有丹青
傳小筆仍添書客倚欄看令與山川相映發龍彎歸路

遠烏尤棟雲簾雨邀人留若為喚得涪翁起題作西南
第一樓

問月堂酌別

半明燈火話悲酸此會情知後會難四海宦遊多聚散
一生情事足愁歡鬢絲今夜不多黑酒量微明無數寬
醉夢登舟都不記但聞風雨滿江寒

別後寄題漢嘉月榭

同年陸務觀所作

隱吏詩情卜築幽同年惜別勸淹留試傾萬景湖亭酒
來看半輪江月秋川路雖長猶共此夜船空載且歸休
碧巖勝處頻回首好事誰能更小樓

我眉縣

窮鄉未省識旌旄大驩呼巷陌騷村媪聚觀行績市
野翁迎拜蹠然萬象清土沃稻芒早縣古林深槐廕高
珍重里儒來獻頌盛言千載此丘遭

初入大我

煙霞沈痼不須醫此去真同汗漫期曾款上清臨大面
仍從太白問我眉山中緣法如今熟世上功名自古癡
賸作畫圖歸挂壁他年猶欲卧遊之

八十四盤

冥鴻無伴鶴孤飛回首塵籠一笑嬉八十四盤新拄杖
萬千三乘舊牙旗石梯碧滑雲生後木葉紅斑雪霽時
說與同行莫惆悵人間捷徑轉欽巖

婆羅平

仙聖飛行此是家路逢真境但驚呀神農嘗外盡靈藥
天女散餘多異花嵐雨逼衣寒似鐵冰泉炊米硬于沙
峯頭事事殊塵世缺甃跳梁笑井蛙

思佛亭曉望

栗烈剛風刮病眸登臨何啻緩千憂界天暑雪青城外
匝地晴雲瓦屋頭浩蕩他年誇北客蒼茫何處認西州
千巖萬壑須尋徧身是江湖不繫舟

槌為江樓

河邊堵立看歸篷
三老開頭暮欲東
漲水稠灘連峽內
淺山浮石似湘中
無人驛路榛榛草
有客江樓浩浩風
種落塵梢少公事
賸裁新語寄詩筒

縣令能詩者

題譚德稱扇

蠻風吹雨瘴江肥
短草荒山鳥不飛
盡是瀘南腸斷句
如今分與故人歸

題楊商卿扇

君歸我去兩銷魂
愁滿千山鎖瘴雲
後夜短檠風雨暗

誰能相伴細論文

發合江數里寄楊商卿諸公

臨分滿意說離愁
草草無言祇淚流
船尾竹林遮縣市
故人猶自立沙頭

過江津縣睡熟不暇梢船

西風扶舫似乘槎
水濶灘沉浪不花
夢裏竹間喧急雪
覺來船底滾鳴沙

涪州江險不可泊入黔江棹舟

黃沙翻浪攻排亭，潰淖百尺呀成坑。
坳窪眩轉久乃平，一渦熨貼千渦生。
篙師絕叫毆川靈，鳴銃飛渡如奔霆。
水從岷來如濁涇，夜榜黔江聊濯纓。
玻璃徹底鏡面平，忽思短棹中流橫。
釣絲隨風浮月明。

妃子園

涪陵荔子天寶所貢

露葉風枝驛騎傳，華清天上一嫣然。
當時若識陳家紫，何處蠻村更有園。

下巖

疇昔中巖一夢殘
下巖風景亦高寒
峽中無處堪停棹
雨後今朝始凭欄
不用苦求毫相現
祇教長挂水簾看
山僧勸我題蒼壁
坡谷前頭未敢刊

夔門即事

夔水不可飲
取之卧龍十里之外

峽行風物不堪論
伴暑驕陽雜瘴氛
人入恭南多附贅
山從夔子盡侵雲
竹枝舊曲元無調
麴米新筍但有聞

試覓清冷一杯水筒泉須自卧龍分

瞿唐行

七月十九日至夔子灩澦徹髮不可犯是夜水漲及
山腹詰旦視灩澦則已在水中土人云此青草齊也
可以冒險而入遂鼓棹畧其頂而過郡中遣候兵立
山上每一舟平安則搖幟以名後舟白鹽赤甲皆峽
口大山黃巖黑石皆峽中至險處入峽西岸有聖泉
舟人或向之疾呼曰人渴也泉即迸下杯許復乾余

舟過甚急未之試也

川靈知我歸有程一夜漲痕千丈生中流擊楫洶作氣
夾峯旗鼓呀失聲不知灩澦在船底但覺瞿唐如鏡平
鑿峽疏川很石破號山索飲飛泉驚白鹽赤甲轉頭失
黑石黃嵌拚命輕草薺增肥無泊處竹枝凝葉空餘情
人間險路此奇絕客裏驚心吾飽更劒閣翻成蜀道易
請歌范子瞿唐行

鄂州南樓

誰將玉笛弄中秋黃鶴飛來識舊遊漢樹有情橫北渚
蜀江無語抱南樓燭天燈火三更市搖月旌旗萬里舟
卻笑鱸江垂釣手武昌魚好便淹留

梅根夾

辛苦凌波棹平安入夾船月明漁浦網風側瓦窰煙老
圓容挑菜村巫橫索錢且投人處宿終夜得佳眠
將至吳中親舊都來相逐感懷有作

望見家山意欲飛古來燕晉一沾衣回思客路豈非夢

乍聽鄉音真是歸新事略從年少問故人
差覺坐中稀
不須更說桑榆暖霜後鱸魚也自肥

淳熙五年四月二日直宿玉堂懷舊二絕句

桂海冰天老歲華直廬重上玉皇家
當年曾識青青鬢
惟有東牆一架花

雪山刁斗不停撾夜把軍書敢顧家
珍重玉堂今夜夢
靜聞宮漏隔宮花

初歸石湖

曉霧朝暾紺碧烘橫塘西岸越城東行人半出稻花上
宿鷺孤明菱葉中信脚自能知舊路驚心時復認鄰翁
當時手種斜橋柳無限鳴蜩翠掃空

贈舉書記歸雲山

一枕清風四十霜孤生無處話淒涼相看只有龐眉客
還在雲丘舊草堂

四股澗松霞斧碎十圍巖桂燒痕枯不知階下跳珠處
舊竹春來有筍無

青山面目想孤依
水石風林入夢思
白髮蒼顏心故在
只如當日看山時

題查山林氏菴

庭戶清深宅翠微
雪如佳壁喚題詩
煙梢矗矗青圍屋
露葉鮮鮮綠滿籬
宿雨一春纔汎鴨
平蕪幾日已藏碑
山僧見客如枯木
疑是嬾殘南嶽師

木瀆道中風雨震雷大作

惡風奔雲何壯哉
溪水欲立山欲摧
石岸迸裂纜邊樹

胡床動搖船底雷
靈巖塔後雨脚挂
胥口廟前浪花來
篷漏衣沾不足惜
酒瓶傾側愁空壘

光福塘上

指點炊煙隔莽蒼
午餐應可寄前莊
鷄聲人語小家樂
木葉草花深巷香
春去已空衣尚絮
雨來何晚稻初芒
祇今農事村村急
第一先陂貯水塘

秋前風雨頓涼

秋期如約不須催
兩脚風聲兩快哉
但得暑光如寇退

不辭老景似潮來酒杯觸撥詩情動書卷招邀病眼開
明日更涼吾已卜暮雲橫作亂峰堆

曉起聞雨

老年稍喜睡魔清兀坐枯株聽五更蕭索輪囷憐燭燼
飛揚跋扈厭蚊聲登高事了從教雨刈熟人忙卻要晴
莫道西成便無慮大須濃日曬香秔

嘲蚊四十韻

暑魃方肆行羽孽亦厲習肖翹極么麼塊北累闢翕濕

生同糞蝸腐化類宵熠初來鬧郭郭少進亘原隰嚶如
蠅聲薨聚若蝨羽緝俄為隱雷悶遂作蜜霰集口銜鋼
鍼鋒力洞衲衣襲啾聲先計議著肉便成吸玄豹猶未
定卓錫已深入血隨姑嘅升勢甚輓轡汲沉酣尻益高
飽滿腹漸急晶晶紫蟹眼滴滴紅飯粒拂掠倦體煩爬
搔痒肌澀救束不虞西擒一已竄十新瘕蓓蕾漲宿軍
斑爛浥竟夜眠展轉連床嘆於悒云何人戚欣乃繫汝
張歛驅以葵扇風熏以艾煙濕檠長鎮藏遮帳隙亟補

茸火攻憚穢臭手拍嫌腥汁伏翼佐掃除網蛛助收拾
薄暮洵交攻大明訐未戢牛草厚逾氈鱉介銛勝釵遭
汝尚欲困嗟人何以給夏蟲雖衆多罪狀相百什蜂蠆
豈房櫳蟣蝨但禪裙羊羶螳登俎驥逸蟲附帛蠓惟舞
醯羗蠹止崇書袞蚤為鵠所撮蠅亦虎能執彼愆可貫
死汝罪當獻級涼飈倏然至醜類殆哉戾一吹翳吻破
再鼓翅翎繫三千死頡利百萬走尋邑快哉六合內茂
有一塵立虛空既清涼家巷得寧輯鷄憲夜可誦蛩機

曉猶織雨簾繡浪卷風燭淚珠泣客來添羽觴人靜拂
塵笈恍還神明觀似啟坏戶蟄消長誰使然智力詎能
及

晚步吳故城下

意行殊不計榛菅風袖飄然勝羽翰拄杖前頭雙雉起
浮圖絕頂一鷗盤醉紅匝地斜曛暖熨練涵空漲水寒
卻向東臯望煙火缺蟾先映樹林丹

北山堂開爐來坐

困眠醒坐一龕多竹洞無關斷客過貪向爐中煨榾柮
嬾從掌上看菴摩間無雜念惟詩在老不甘心奈鏡何
八萬四千安樂法元無秘密可伽陀

北城梅為雪所厄

凍蕊粘枝瘦欲乾新年猶未有春看雪花祇欲欺紅紫
不道梅花也怕寒

浙東舟中

處處槿樊園家家桃廡門魚鹽臨水市烟火隔江村雨

過張帆重潮來汲井渾彎跼短篷底休說兩朱幡

東門外觀刈熟民間租米船相銜入城喜作二絕
菊莎杞棘爨無烟日日文書橫索錢今日甬東官況好
東津門外看租船

潮到靈橋綠繞船海邊力穡屢豐年淡青山色深黃稻
恰似胥門九月天

重陽九經堂作

俗聞佳節自匆匆老去愁秋又客中青嶂卷簾三面月

黃花吹鬢幾絲風十年故國新栽柳萬里他鄉舊轉蓬
誰與安排今夜夢片帆飛到小籬東

大廳後堂南窓負暄

萬壑無聲海不波一窓油紙暮春和醉眠陡覺氍毹贅
圍坐翻嫌楮拙多水暖玉池添嗽嚙花生銀海費揩摩
端如擁褐茅簷下祇欠烏烏擊缶歌

晚步北園

刮地晴飈退海痕出門無扇可障塵麥粘瘠土何時雪

梅糝疎林昨夜春
天鏡風煙疑夢事
鬢霜時節尚官身
裹章束帶朝還暮
慚愧青鞋紫領巾

春前十日作


臘淺猶賒十日春
官忙長愧百年身
雪催未動詩無力
愁遣還來酒不神
節物何曾欺老病
書生自慣說悲辛
終朝戲促成何事
今古紛紛一窖塵

懷歸寄題小艇

日出塵生萬劫忙
可憐虛費隙駒光
若教閒裏工夫到

始覺淡中滋味長
歲晚角巾思芋栗
年來手版愧耕桑
松風蘿月須相信
春水深時上野航

宋詩鈔卷六十二



總校官庶吉士臣張能照
校對官庶吉士臣陳崇本
謄錄監生臣衛子忠